



ANG **Paghimakas**

PAHAYAGAN SANG PARTIDO KOMUNISTA SANG PILIPINAS ★ ISLA SANG NEGROS

GINAUBAYAN SANG MARXISMO-LLENINISMO-MAOISMO MARSO 29, 2019

| [angpaghimakas.wordpress.com](http://angpaghimakas.wordpress.com) | [facebook.com/angpaghimakas.58](https://facebook.com/angpaghimakas.58) | [angpaghimakas@yahoo.com](mailto:angpaghimakas@yahoo.com) | .....

# SELEBRAHON ANG BULAWANON NGA ANIBERSARYO SANG BAG-ONG HANGAWAY SANG BANWA!

AWAYON KAG PASLAWON ANG TODO-LARGA NGA KONTRA REBOLUSYONARYO NGA GYERA SANG GARUK KAG PASISTA NGA REHIMEN SANG US-DUTERTE! ISULONG ANG INAWAY BANWA TUBTOB SA KADALAG-AN!

*Komiteng Rehiyunal sang Partido sa Isla sang Negros  
Marso 29, 2019*

Nagasaludo ang Komiteng Rehiyunal sang Partido sa Isla sang Negros sa makasaysayan nga bulawanon nga anibersaryo sang Bag-ong Hangaway sang Banwa (BHB) nga gintukod sang Partido Komunista sang Pilipinas (PKP) sadtong Marso 29, 1969. Upod ang masa kag pumuluyo sa Negros Occidental, Negros Oriental kag sa bilog nga pungsod, amon ihalad ang Pulang saludo sa tanan nga pulang hangaway kag kumander sa pinakapalangga naton nga hukbo sa pinakamaayo nga mga anak sang pumuluyo. Selebrahon naton ang kadalag-an sang BHB sa nagligad nga 50 ka tuig nga pagserbisyo sa masang anakbalhas kag pumuluyo kag tayuyon nga pagtipon sang rebolusyonaryo nga kusog sa patag sang militar kag pulitika.

Importante ang mga kadalag-an nga ini para sa dugang nga pagpabaskog sa aton pwersa kag pagsulong sang inaway banwa sa tunga sang todo-larga nga kontra-rebolusyonaryo gyerang ginalunsar subong sang rehimeng US-Duterte paagi sa laye militar (martial law) sa Mindanao kag de facto martial law sa iban pa nga bahin sang isla, kabahin na ang isla sang Negros.

Nagatinikal subong ang mga pasistang AFP kag PNP tungod nadakpan nila ang abi nila “daku nga isda” sang Negros: si Kaupod Frank Fernandez nga tagapamaba sang National Democratic Front (NDF) diri sa Negros, kag Kaupod Cleofe Lagtapon. Pero samtang nagakadlaw ang mga pasista nga ini, ang mga Negrosanon kag bug-os nga pumuluyo mas labi pa nga nagakaugot sa ila nga pagpanghambog kag desperado nga tikang sa pagpaniktik, pagdakup, kag pagpriso sa ila ni Ka Frank kag Ka Cleofe sa pihak sang ila katigulangon kag maluya nga ikaayong lawas.

Ang wala untat nga pasistang kakugmat, pagpigog, kabutigan kag kabuang sang rehimen ang nagtulod mismo sa BHB, mga rebolusyonaryo nga pwersa kag masa agud mas labi pa nga magpabakod kag magpakahanas, sa lain-lain nga dagway sang pakig-away labi na sa malapnagon kag masunson nga inaway gerilya base sa nagalapad kag nagadalum nga baseng masa.

Ang mahinungdanon pag-integrar kag implementasyon sang mga hilikuton sa armado nga paghimakas, rebolusyong agraryo kag pagtukod sang mga organo




sa gahum pampulitika epektibo nga makapreserba kag makapauswag sa rebolusyonaryong kusog sa kaumhan padulong sa mas mataas nga halintang sang inaway banwa. Ang maisogon nga pag-atubang kag pagpaslaw sang BHB kag masa sa kontra rebolusyonaryo nga gyera sa subong nga rehimen kag ang malapad nga punsodnon nga kahublagan kontra sa tiraniya, korapsyon, palas-anon nga mga patakaran pang-ekonomiya kag padayon nga pagbaligya sang pungsudnon nga soberanya sa US kag mangin sa Tsina, ang lubos nga nagligwin kay Duterte sa pumuluyo hasta nga mapatalsik ini.

Ihatag naton ang pinakamataas nga pagsaludo sa aton mga martir kag baganihan sang inaway banwa, ang madamu nga mga pulang kumander kag hangaway sang hukbo sang pumuluyo naghalad sang ila kabuhi para matukod ang hukbo sang pumuluyo, maisog nga ginapangapinan ang masa halin sa pagpang-abuso kag pangpang-atake sang mga armado nga idu-ido sang lokal nga nagaharing sahi, neokolonyal nga estado kag imperyalismo, kag para isulong ang bag-o nga demokratiko nga rebolusyon sa Pilipinas paagi sa pangmalawigon nga inaway banwa.

Sa isla sang Negros, indi malipatan sang masa kag pumuluyo ang dungganon nga kabuhi kag paghimakas nila Kaupod Apolinario Gatmaitan, Leonardo Panaligan, Roselyn Pelle, Armando Sumayang Jr, Rachelle Mae Palang kag iban pa nga mga martir kag bagani halin sa hanay sang mga mamumugon, mangunguma kag mamumugon sa kaumhan, kababaenhan, estudyante nga pamatan-on, imol nga taga-syudad, propesyunal kag intelektwal sa kasyudaran kag iban pa nga ginahimuslan nga sektor sa sosyedad. Ginpili nila nga magbulig sa masa kag sa rebolusyon paagi sa pinakamataas nga dagway sang paghimakas. Ginsindihan nila ang kalayo sang armado nga paghimakas nga sa subong nagadaba-daba sa bilog isla kag bilog pungsod. Ila gin-iwagan ang banas padulong sa masanag nga rebolusyonaryo nga palaabuton sa mga baganihang pumuluyong Pilipino nga makahas nga maghimakas kag magmadinalag-on.

## **Ang Rebolusyonaryo nga Armadong Paghimakas sa Negros**

Temprano pa sang 1969 nasugudan na ang armado nga paghimakas sa isla sang ginpadala ang magamay nga armado nga yunit para ipatuman ang hilikuton masa sa bukid nga bahin sang North Negros. Isa ka magamay nga yunit sang Partido kag istap sang Dumaguete Times kabahin sa nagpropaganda sang pungsudnon demokratiko nga linya kag pag-analisa sa mga lokal nga isyu. Ang una nga armado nga yunit sa North Negros mapagsik nga naglunsar sang mga aksyon militar apang nabudlayan sila tungod sa kapaslawan sa pagtukod sang baseng masa antes



ipatuman ang mga ini kontra sa dalagku kag poderoso nga mga kaaway.

Apang sadtong temprano pa nga bahin sang dekada '70, kaupod ang padayon nga paghimakas sang Partido nga ihanda ang kaumhan sa Negros para sa gerilya nga pagkig-away, ang paghimakas masa naglapta nga daw kalayo nga indi mapunggan. Paslaw ang mga reaksyunaryo sa pagtapna sa mga mamumugon, mangunguma, kag mamumugon sa kaumhan nga naglunsar sang mga protesta batuk sa denikada nga pagpanghimulos sang dalagku agalon mayduta-kumprador sa sistema nga hasyenda kag industriya sang kalamay sa isla.

Paagi sa ikaduha nga kahublagan propaganda, ang mga pamatan-on nga naka-eskwela sa mga sentrong syudad pareho sa Manila nagbalik sa Negros kag nagkadto sa kaumhan para magpatuman sa mga mahinungdanon nga hilikuton sa pagpalapnag sang Marxismo kag sang punsudnon demokratiko nga linya, pagkondukta sang pangsosyedad nga pagpangusisa, kag pagpreparar sa mga erya para mangin sona gerilya. Ang mga mamumugon kag mangunguma nasubhan sa kahublagan masa, upod ang pamatan-on, mga tawo simbahan kag iban pa nga sektor nga nagasuporta sa paghimakas sang baseng masa, tubtob nga nag-uyat sang armas kag nangin Pulang hukbo.

Halin sa panugod nga eksperyensya nangin armado sa leksyon, sadtong 1973 natukod na sang Partido paagi sa BHB ang mga rebolusyonaryo nga baseng masa upod sa imol nga mangunguma kag tumandok sa erya sang Cauayan-Hinobaan-Ilog-Candoni-Kabankalan-Sipalay o

CHICKS sa Sur nga bahin sang Negros Occidental. Nahimo ini paagi sa matutom nga hilikuton masa, mga breyktru sa kontra-pyudal nga paghimakas kag madinalag-on nga punitibong aksyon kontra sa mga ginakangil-aran nga mga despotiko nga agalon may duta kag ila nga armadong goons. Sang 1976, ang hukbo sang banwa nalab-ot na bisan ang interyor nga mga baryo sa kaiping nga banwa sang Negros Oriental.

Ang pagtukod sang BHB sa Negros may signipikante kag madalum nga epekto sa masa nga dugay na nga ginahandum nga maka angkon sang ila kaugalingon nga hukbo. Ang pagluntad sang pulang hangaway sang NPA ka kabukiran naghawan sa dalan para mahangpan sang pumuluyo ang mga rason sa likod sang kapigaduhon, kagutom nga ila naagihan, inhustisya kag lain-lain nga dagway sang pagpamigos kag pangpanghimulos sang agalong may duta kag kumprador sa Negros nga kadam-an nakabase sa Manila kag ang nagapangibabaw sa pulitika kag ekonomiya sang mala-kolonyal kag mala-pyudal nga sosyedad.

Ang padayon nga pagdaku sang kahublagan masa sa mga sentrong urban sang Negros sadtong dekada '70 tubtob sa tunga-tunga sang dekada '80 naghatag sa armadong rebolusyon sang tayuyon nga tuburan sa lubos panahon nga pwersa ("full-time forces") halin sa mamumugon, estudyante, taong simbahan, titsers kag halin sa hanay sa mga sadto anay bilanggo politikal, nga gin-mobilisa sulod sa komprehensibo nga pag-uswag sang mga larangan gerilya kag pagtukod sang bag-o.

Ang makahas kag madinalag-on nga taktikal nga opensiba sang BHB sa Negros sa sini nga panahon nga amo ang nagtampok sa Negros bilang isa ka "bulkan sosyal" sang naga-indakal nga banggianay sa tunga sang nagahari nga sahi kag ginaharian, ang nagahimulos kag ginahimuslan. Ang epektibo nga taktika kag teknika sa pakig-away, upod ang mainit nga suporta halin sa masang mangunguma kag pumuluyo, ang naghatag sang daku nga kumpyansa sa BHB para awayon ang mga "private army" ukon armadong kusog sang dalagku agalon mayduta-kumprador sa Negros kag ang armado nga kusog sang bilog nga reaksyunaryo nga estado nga ginatiglawasan sang AFP, PNP kag ila mga paramilitar.

Bisan nalab-ot na sang rebolusyonaryo nga kahublagan kag armado nga paghimakas sa Negros ang wala kapareho nga pag-ibwal sadtong Dekada '80, sa amo sini nga panahon nagluntad ang sayop nga linya ni Arturo Tabara kag iya nga rebisyunista nga grupo sa sulod sang Bisayas Komisyon kag ang Komiteng Rehiyunal sang Partido sa Negros hasta nga napatuman ini sa bilog na rehiyon. Ang sayop nga linya sang estratehiko nga kontra-opensiba o SCO, nga ginlaragway sang indi sa panahon nga regularisasyon sang mga yunit

gerilya kag insureksyunismo sa kasyudaran, nagdala sang sunod-sunod nga kapaslawan sa BHB kag nagresulta sa paggamay sang baseng masa kag rebolusyunaryo nga kahublagan sa Negros.

Bangud sa sini nga dis-orientasyon, mas nangin vulnerable ang bilog nga rebolusyunaryo nga kahublagan sa kabaris nga atake sang Oplan Thunderbolt, ang kontra-insurhensiya nga plano sang AFP sa Negros sadtong katapusan nga bahin sang dekada '80 nga nagdala sang wala tupong nga halit sa kabuhi kag palangabuhian sang masa. Ang grabe nga militarisasyon, pagpangbomba sa mga komunidad kag iban pa nga pagpang-abuso sang kaaway gin-atubang paagi sa putsista kag lunsay-militar nga mga aksyon nga naggasgas sa rebolusyonaryo nga pwersa kag pagpatumbaya sa matutom nga hilikuton masa. Ang Tabara nga grupo ang nagduso sa sayop nga linya nga amo ang mas nagwasak sa rebolusyonaryo nga kahublagan sa isla. Ini nagpadulong sa paksyunalismo, sa pagtuhaw sang ila kaugalingon nga bangkarote nga partido kag bandido nga armado nga pwersa, partikular sa bogus nga Revolutionary Proletarian Army ukon RPA nga sa karon nahublasan na kag notoryus sa Negros bilang mersenaryo sang mga despotiko agalon mayduta-kumprador kag garuk nga mga politiko.

Kapareho sang panindugan sa mga bag-o nga usbong nga proletaryong rebolusyonaryo sadto sang Una nga Dungganon nga Kahublagan Panadlong nga nagtukod liwat sa Partido kag sang hangaway sang banwa sang 1968-1969 halin sa nabilin nga maayo nga mga elemento sang daan nga Partido Komunista kag Hukbong Mapagpalaya ng Bayan (HMB), ang mga proletaryong rebolusyonaryo sa Negros sadtong dekada '90 gin-ako ang hilikuton sang liwat nga pagpabaskog sang rebolusyonaryo nga kahublagan halin sa nabilin nga mga kadre nga nagpanindugan para sa pagtadlong sa mga kasaypanan kag liwat nga itib-ong

---

*Ang pagtukod sang BHB  
sa Negros may signipikante  
kag madalum nga epekto  
sa masa nga dugay na  
nga ginahandum nga  
makaangkon sang ila  
kaugalingon nga hukbo*



ang mga sandigan nga prinsipyo kag ang nabilin nga 70 nga hangaway sang BHB, nga nagkomposar lang sa 3% sa kabilugan nga kusog sang rebolusyonaryo nga kahublagaan sa panahon sa dis-orientasyon.

Ang kadalag-an sang Ikaduha nga Dungganan Kahublagaan Panadlong (IDKP) ginkilala sa isla nga isa sa pinakasignipikante nga kadalag-an sang Partido sa Negros tungod indi lang ini desaysibo nga ginluwas ang rebolusyonaryo nga kahublagaan sa rehiyon apang ini nagdala sang paborable nga posisyon para sa mas dalagkuan nga pagsulong.

Ang nabilin nga duha ka platon nga kusog sang BHB matapos ang pagkawasak sini sa dis-orientasyon, nahimo nga nangin binhi nga nagdala sa pagdaku sang armado nga rebolusyon sa Negros sa banas sa husto nga linya sang demokratiko nga rebolusyon sang pumuluyo nga may sosyalista nga padulungan.

Ang Apolinario Gatmaitan Command (AGC), ang rehiyunal nga kumand sang BHB sa Negros, kabahin ang operational command sa nagkalain-lain nga larangan gerilya sa bug-os nga isla, padayon nga naangkon ang kumpyansa, suporta kag pagpalangga sang masa. Ang hukbo sang banwa nagapanguna nga instrumento nga gintukod sang Partido para batu-an ang suldado nga AFP kag sa palaaboton dugmukon ini, samtang nagapatuman sang hilikuton sa pagpundar sang baseng masa, organo sang gahum pampulitika, buluhaton sa produksyon, hilikuton pangkultura, edukasyon pampulitika sa masa kag iban pa nga hilikuton.

Ginpamatud-an sang BHB ang iya salsalon nga disiplinang sa pagpatuman sa mga rebolusyonaryo nga hilikuton sa ubay kag absoluto nga pagpamuno sang Partido. Ang madalom nga pag-ugat sini sa masa, pareho sa napamatud-an sadto sa panahon sang diktadurya ni Marcos kung diin ang rebolusyonaryo nga pwersa linghod pa kag nagapanugod pa lang, kag upod sa sunod-sunod nga mga kontra rebolusyonaryo nga kampanya sang mga papet nga

rehimen nga sunod-sunod man nga napaslaw sang BHB kag sang bilog nga rebolusyonaryo nga kahublagaan.

Padayon nga nagabaskug ang BHB sa iya kaugalingon upod ang rebolusyonaryo nga masa sa pag-atubang kag pagpaslaw sa todo-larga nga kontra rebolusyonaryo nga gyera sang rehimen US-Duterte. Ang makasiligni nga atake sang estado batuk sa mga rebolusyonaryo nga pwersa kag pumuluyo sang Negros ang naghatag sa BHB sang linibo kag isa nga mga target para sa paglunsar sang taktikal nga opensiba nga magadul-ong sang dugang nga armas sa arsenal sang hukbo sang banwa, magpatalom sa ikasarang sa pulitika kag militar sang linibo ka pula nga kumander, hangaway kag mga masa nga napanday sa masingki nga paghimakas.

Sa tunga sang mga taktikal nga opensiba nga magdala sang solido nga bunal sa ulo sa kaaway, permi nga handa ang rebolusyonaryo nga masa sa Negros nga dugang pauswagon ang praktika sang gerilya nga pakig-away sang masa, pauswagon sa istruktura kag katungdanan sang ginatos nga yunit milisya sang banwa kag mga yunit-pangdepesa sa mga baryo para sa punitibong aksyon kag atritibo nga atake nga maghatag sang linibo kag isa ka bira sa lawas sang kaaway. Ang mga lubos panahon nga yunit gerilya sang BHB nagpauswag man sang deployment kag pagmobilisa sa iya mga sandigan nga pormasyon sa mga sonang gerilya, kag ang pagpatuman sang partisano nga operasyon sa mga sentrong urban agud silutan ang mga bat-ulan nga mga kriminal sa sulod sa hanay sang mga kaaway sa sahi kag reaksyonaryo nga estado.

### **Mga Hangkat sa Brutal nga Kontra Rebolusyonaryo nga Gyera ni Duterte sa Negros**

Ang pasista nga kakugmat nga gintuga sang armado nga kusog sang rehimen US-Duterte sa Negros halin sa sunod-sunod nga pagpamatay sa mga lider mangunguma kag aktibista, ang pagmasaker sa mga mamumugon sa uma sa Sagay, kag ang nagapadayon nga pagpang-atake sang Oplan Sauron sa mga komunidad sang mga mangunguma sa syudad sang Guihulngan kag iban pa nga bahin sang Negros, mga bangkarote nga tikang sang isa ka garuk kag nagahuyango nga rehimen nga nahamulag sa masa. Ang arogante nga deklarasyon nga “todo gyera” sang AFP kag ang pag-imposar ni Duterte sang de facto martial law sa Negros paagi sa iya Memorandum Order 32 kag Executive Order 70 mga indikasyon sang nagadasig nga pagkadunot sang mala-kolonyal kag mala-pyudal nga nagahari nga sistema nga sa subong ginapamunuan sang isa ka buang nga manugpatay-tawo.

Ang wala kaluoy nga pasistang pagpang-atake sang US Duterte nga rehimen nga kadungan sini sa mga patakaran sang gobyerno nga padayon nagapabug-at sa pumuluyo,

nagtulod sa pumuluyo, ilabe na sa masang mangunguma, nga magsuporta sa hangaway sang pumuluyo kag sang armado nga paghimakas paagi sa direkta nga pakigbahin kag paghalad sang ila nga lubos panahon nga pag-upod sa BHB, sa ila pag-uyat sang armas agud isulong ang rebolusyon.

Ang rebolusyonaryo nga kahublagan sa Negros ginauyatan ang malig-on nga paghiliusa, bastante nga kusog kag suporta sang masa, ang husto nga linya kag hugot nga pagpamuno sang Partido nga kinahanglan para sa armado nga rebolusyon agud dugang nga isulong sa isla kag makaamot sa subong nga pungsodnon nga pagtinguha sa pagpauswag sang inaway banwa pakadto sa abanse nga halintang sang estratehiko nga depensiba. Kun masarangan sang BHB kag masa, sa ubay sang Partido, nga ilunsar ang armadong rebolusyon sa Negros kag sa iban nga bahin sang pungsod halin sa wala sadtong 1969, palaparon kag pabakuron sa ti-on sang pinakamapintas nga kahimtangan sa idalum sang diktadurya ni Marcos. kag pagpangibabaw sang malala nga kahalitan tuga sang mga kahuyangan kag kasaypanan sa panahon sang dis-oryentasyon, ang suhetibo nga pwersa sang rebolusyon yara subong sa pinakapaborable nga posisyon sa pagpatuman sang pagkabilugan nga panawagan sang Partido para sa paglabot sa tanan nga bahin nga kadalag-an sa pagpasulong sang demokratiko nga rebolusyon sang pumuluyo sa masunod nga mga katuigan.

Ang bulawanon nga anibersaryo sang BHB pinakapaborable nga panahon sa pagsindi sa diwa sang indi maka-ugalingon nga pag-alagad sa pumuluyo, kag para sa matutom nga pagpatuman sang mga hilikuton sang Partido, Pulang hukbo kag masa sa pagpasulong sang inaway banwa:

**1. Padakuon sang pila ka pilo ang katapuan sang BHB.**

Sistematiko nga planohan kag ipatuman ang mga kampanya propaganda kag edukasyon sa hanay sang pumuluyo kag mga organisasyon masa para sa pagpabaskug sa rekrutment kag pagsuporta sa hukbo sang pumuluyo. Ipatapo sa BHB ang madamu nga kadre kag aktibista halin sa hanay sang mamumugon kag intelektwal.

**2. Pauswag sa planado nga pamaagi ang kapasidad sang hukbo sang pumuluyo paagi sa padayon nga pagtukod sa ideolohiya kag pagtib-ong sa absoluto nga pagpamuno sang Partido; sistematiko nga paghanas sa teorya kag praktika para sa pagpataas sa kapasidad sa pakig-away, paghulag kag operasyon sang pormasyon platun, pagpaniktik, operasyon partisano, kag iban**

pa; padayon nga pataason ang politikal nga kamuklatan; pagtudlo sa diwang opensiba; muklat sa sansalon nga disiplina; kag pagpatuman sang linyang masa.

**3. Dugang nga pauswag sa lain-lain nga lebel sang pamumuno kag kumand sa rehiyon para sa gilayon nga pag-analisa sa sitwasyon, pagplano kag pagsubaybay sa hilikuton pang-militar kag pulitikal, mainalamon nga pagmaksimisa sa latag kag kadalumon sang hukbo, kag direkta nga koordinasyon kag pagbinuligay sang lain-lain nga pwersang gerilya.**

**4. Pasingkion ang mga anihilatibong sandigan nga taktikal nga opensiba para makatigayon sang solido nga bira sa kaaway kag makakumpiska sang armas para sa hukbo sang pumuluyo. Ang planado kag madinalag-on nga mga taktikal nga opensiba makapahuyang sa kaaway kag makapabakod sa hukbo sang pumuluyo, maghatag sang kusog kag kapagsik sang kontra-pyudal nga paghimakas kag iban pa nga paghimakas sang pumuluyo, kag magpalapad sa demokratiko nga gahum pampulitika. Padayon nga awayon ang konserbatismo sa militar.**

**5. Padamuon kag palaparon ang mga yunit milisya sang banwa, yunit pangdepensa sang baryo kag grupo pangdepensa sang mga organisasyong masa. Ipasiguro ang epektibo nga pagpamuno sang Partido kag ang kumand sang hukbo sang pumuluyo sa mga yunit, kag dugang nga pauswag ang ila kinaalam kag ikasarang sa pagpasulong sang gerilya nga pakig-away sang masa.**

**MABUHAY ANG BAG-O NGA HANGAWAY SANG BANWA!  
MABUHAY ANG PAGHIMAKAS SANG PUMULUYONG PILIPINO!  
ISULONG ANG INAWAY BANWA TUBTOB SA KADALAG-AN!**





# DIGMANG BAYAN HANGGANG SA TAGUMPAY! SUMAPI SA NPA!

